

tamiæ Episcopis, a Jacobitarum hæresi atque persecutionibus ad Ecclesiæ Catholicæ gremium confugientibus, domicilii locum, quo se se in Urbe reciperent, annuosque redditus constituit. Armeniorum usui a S. Pio V. addictas domos, vetustate labentes, refecit, auxit, ornavit: Antistitum & Sacerdotum ejusdem Nationis, religionis causa ad Urbem confluentium, quos antea loci angustia excludebant, liberaliter commoditati prospexit, novis & opportunis extructis ædibus. Binos Assyriæ & Chaldææ Patriarchas, in urbe Mesopotamiæ Amida Sedem figentes, confirmavit, Nestoriana Secta nequidquam oblatrante. Joannem Ægyptiorum, quos Coptos vocamus, Alexandrinum Patriarcham, erroribus Dioscorianis licet addictum, quem acceperat, Evangelicos Præcones ibi degentes perhumaniter excepisse, liberamque simul cuique gentis suæ, Romanam Catholicam Fidem amplectendi, potestatem fecif-